

菊

譜

范成大撰

中華書局

菊譜并序

宋 石湖范成大 至能撰

山林好事者。或以菊比君子。其說以謂歲華晚。草木變衰。乃獨燁然秀發。傲睨風露。此幽人逸士之操。雖寂寥荒寒。而味道之腴。不改其樂者也。神農書。以菊爲養性上藥。能輕身延年。南陽人飲其潭水。皆壽百歲。使夫人者有爲於當年。醫國庇民。亦猶是而已。菊於君子之道。誠有臭味哉。月令以動植志氣候。如桃桐輩。直云始華。而菊獨曰菊有黃華。豈以其正色獨立。不伍衆草。變詞而言之歟。故名勝之士。未有不愛菊者。至陶淵明尤甚愛之。而菊名益重。又其花時。秋暑始退。歲事既登。天氣高明。人情舒閒。騷人飲流。亦以菊爲時花。移檻列斛。輦致觴詠間。謂之重九節物。此雖非深知菊者。要亦不可謂不愛菊也。愛者既多。種者日廣。吳下老圃。伺春苗尺許時。掇去其顛。數日則歧出兩枝。又掇之。每掇益歧。至秋。則一幹所出。數百千朵。婆娑團欒。如車蓋熏籠矣。人力勤。土又膏沃。花亦爲之屢變。頃見東陽人家菊圃。多至七十種。淳熙丙午。范村所植。正得三十六種。悉爲譜之。明年將益訪求。它品爲後譜云。

黃花

勝金黃。一名大金黃。菊以黃爲正。此品最爲豐縟。而加輕盈。花葉微尖。但條梗纖弱。難得團簇。作大本。須留意扶植。乃成。

疊金黃一名明州黃。又名小金黃。花心極小。疊葉稠密。狀如笑靨。花有富貴氣。開早。

棣棠菊一名金餛飩。花纖穠。酷似棣棠。色深如赤金。它花色皆不及。蓋奇品也。窠株不甚高。金陵最多。

疊羅黃。狀如小金黃。花葉尖瘦。如剪羅縠。三兩花自作一高枝出叢上。意度瀟灑。

麝香黃。花心豐腴。傍短葉密承之。格極高勝。亦有白者。大略似白佛頂。而勝之遠甚。吳中比年始有。

千葉小金錢。略似明州黃。花葉中外疊整齊。心甚大。

太真黃。花如小金錢。加鮮明。

單葉小金錢。花心尤大。開最早。重陽前已爛漫。

垂絲菊。花葉深黃。莖極柔細。隨風動搖。如垂絲海棠。

鴛鴦菊。花常相偶。葉深碧。

金鈴菊一名荔枝菊。舉體千葉細瓣。簇成小毬。如小荔枝。枝條長茂。可以攬結。江東人喜種之。有結爲浮

圖樓閣高丈餘者。余頃北使過樂城。其地多菊。家家以盆盎遮門。悉爲鸞鳳亭臺之狀。卽此一種。

毬子菊。如金鈴而差小。二種相去不遠。其大小名字。出於栽培肥瘠之別。

小金鈴一名夏菊花。如金鈴而極小。無大本。夏中開。

藤菊。花密。條柔以長。如藤蔓。可編作屏幃。亦名棚菊。種之坡上。則垂下。長數尺。如纓絡。尤宜池潭之瀨。

十樣菊。一本開花。形模各異。或多葉。或單葉。或大或小。或如金鈴。往往有六七色以成數。通名之曰十樣。

衢嚴間花黃。杭之屬邑有白者。

甘菊一名家菊。人家種以供蔬茹。凡菊葉皆深綠而厚。味極苦。或有毛。惟此葉淡綠柔瑩。味微甘。咀嚼香味俱勝。擷以作羹。及泛茶。極有風致。大隨子所賦。卽此種花。差勝野菊。甚美本不繁花。野菊。旅生田野及水濱。花單葉極瑣細。

白花

五月菊。花心極大。每一鬚皆中空。攢成一團毬。子紅白。單葉繞承之。每枝只一花。徑二寸。葉似同蒿。夏中開。近年院體畫草蟲。喜以此菊寫生。

金杯玉盤。中心黃。四傍淺白。大葉三數層。花頭徑三寸。菊之大者不過此。本出江東。比年稍移栽吳下。此與五月菊二品。以其花徑寸特大。故列之於前。

喜容。千葉。花初開微黃。花心極小。花中色深。外微暈淡。欣然丰艷有喜色。甚稱其名。久則變白。尤耐封殖。可以引長七八尺至一丈。亦可攪結。白花中高品也。

御衣黃。千葉。花初開深鵝黃。大略似喜容。而差疎瘦。久則變白。

萬鈴菊。中心淡黃。餽子傍白花葉繞之。花端極尖。香尤清烈。

蓮花菊。如小白蓮花。多葉而無心。花頭疎極。蕭散清絕。一枝只一葩。綠葉亦甚纖巧。芙蓉菊。開就者如小木芙蓉。尤穠盛者如樓子芍藥。但難培植。多不能繁縵。

茉莉菊。花葉繁縷。全似茉莉。綠葉亦似之。長大而圓淨。

木香菊。多葉。略似御衣黃。初開淺鵝黃。久則淡白。花葉尖薄。盛開則微卷。芳氣最烈。一名腦子菊。

醴醴菊。細葉稠疊。全似醴醴。比茉莉差小而圓。

艾葉菊。心小。葉單。綠葉尖長似蓬艾。

白麝香。似麝香。黃花差小。亦豐腴韻勝。

白荔枝。與金鈴同。但花白耳。

銀杏菊。淡白。時有微紅花。葉尖綠。葉全似銀杏葉。

波斯菊。花頭極大。一枝只一葩。喜倒垂下。久則微捲。如髮之髻。

佛頂菊。亦名佛頭菊。中黃。心極大。四傍白花一層繞之。初秋先開白色。漸沁微紅。

桃花菊。多葉至四五重。粉紅色。濃淡在桃杏紅梅之間。未霜即開。最爲妍麗。中秋後便可賞。以其質如白之受采。故附白花。

燕脂菊。類桃花菊。深紅淺紫。比燕脂色尤重。比年始有之。此品既出。桃花菊遂無顏色。蓋奇品也。姑附白

花之後。

紫菊。一名孩兒菊。花如紫葍。叢苗細碎。微有菊香。或云卽澤蘭也。以其與菊同時。又常及重九。故附於菊。

後序

菊有黃白二種。而二黃爲正。洛人於牡丹。獨曰花而不名。好事者於菊。亦但曰黃花。皆所以貴珍之故也。譜先黃而次白。陶隱居謂菊有二種。一種莖紫氣芳味甘葉嫩可食。花微小者爲眞。其青莖細葉作蒿艾氣味苦。花大名苦薏。非眞也。今吳下惟甘菊一種可食。花細碎品不甚高。餘味皆苦。白花尤甚。花亦大。隱居論藥。既不以此爲眞。後復云。白菊治風眩。陳藏器之說亦然。靈寶方及抱朴子丹法文。悉用白菊。蓋與前說相抵牾。今詳此。唯甘菊一種可食。亦入藥餌。餘黃白二花。雖不可茹。皆可入藥。而治頭風。則尙白者。此論堅定無疑。併附著於後。